

Giusep Gieriet-Tuor v. scolast Camischolas



Dapi dus meins ruaussan las restonzas da scolast Giusep Gieriet sin santeri sut baselgia da s. Vigeli Sedrun. En aulta vegliadetgna da prest 91 onns eis el sedurmentaus migeivlamein il di da s. Vinzens ils 22 da schaner 1997 ella casa da vegls s. Vigeli da Tujetsch. Ils 25 da schaner ha ina baselgia emplenia assistiu al riug funeral. Quei se capescha buca da sesez, pertgei la giuvna generaziun enconuscha strusch la glieud en aulta vegliadetgna. Ina resumada digl operar da quei bien carstgaun cudezza mei sco engraziament pil prestau.

Staziuns da sia veta

Scolast Giusep ei naschius a Mustér ils 25 da fevrer 1906 sco fegl da Gieri Giusep e Nescha Gieriet nata Berther. Cun quater fargliuns ha el passentau leu ina biala e sulegliva affonza. Il premurau e talentus giuven ha giu la cuida da frequentar il seminari da scolasts a Cuera. Gl'onn 1927 banduna el quel cun ina stupenta patenta en sac, bein preparaus per sia sublima clama da. Da quei temps scolasts en abundanza. Sias activitads sco scolast han

entschiet pér 1929 tochen 1970. Ses posts da clamada einstai Schlans, Surin, Selva, Rueras e Sedrun. En tut pia 41 onns da survetsch. Engaschi scalem ault, miez e scalem bass. Sia instrucziun era plein buontad e premura. Savens eis ella vegnida nezegiada ora da scolars e magari era da geniturs. Tonaton ha ella purtau fretg e success.

Per la cultura ei nies bien Giusep s'engaschaus cun forza cumpleina. Neginas stentas eran per el da memia. Cun ses duns musicals ha el diregiu ils Chors - baselgia Selva e Rueras e leutier aunc staus biars onns organist a Rueras. Quei tut per la pagaglia celestriala. Sco successur d'organist hiel adina smarvegliau co el saveva carmelar ses tuns d'orgla en tutta ruasseivladad cun peis e mauns. Duront sia serasontga era il tedlar musica e leger per el in grond cunfiert per la liung'uriala e fageva emblidar ses mals che han era buca schanegiau el en la vegliadetgna. Sia cara dunna Augusta e sia feglia adoptada Gritli han tgirau e giu quitau pil Giusep cun pazienza e premura tochen la mort. Persuenter eis el adina staus engrazieivels e schava sentir quei sin mintga viseta. Era nus Tuatschins anteriurs scolars e scolaras engraziein per tut il prestau e lein tener Tei car Giusep en bona memoria. Bien amitg, rauassa e gauda la paisch cun musica celestriala

Vinzens Pally